



Broj: 06-1-07-1-4939/22
Sarajevo, 20.12.2022. godine
(E.K)

Na osnovu člana 2.9 tačka 17, a u vezi sa članom 10.16 stav (3) Izbornog zakona Bosne i Hercegovine ("Službeni glasnik BiH", br. 23/01, 07/02, 09/02, 20/02, 25/02, 04/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 52/22 i 67/22) i Kriterija i postupka popune nedostajućih mandata u Domu naroda Parlamenta Federacije Bosne i Hercegovine („Službeni glasnik BiH“, broj: 75/22), Centralna izborna komisija Bosne i Hercegovine je na 99. sjednici, održanoj 20.12.2022. godine, **d o n i j e l a**

O D L U K U

o dodjeli mandata delegatu u Domu naroda Parlamenta Federacije Bosne i Hercegovine

Almiru Babajiću, kandidatu s liste političkog subjekta SDP- SOCIJALDEMOKRATSKA PARTIJA BOSNE I HERCEGOVINE za Skupštinu Tuzlanskog kantona za Opće izbore 2022. godine, dodjeljuje se mandat delegata u Domu naroda Parlamenta Federacije Bosne i Hercegovine iz reda Ostalih.

O b r a z l o ž e n j e

Centralna izborna komisija Bosne i Hercegovine nakon postupka ponovne raspodjele mandata iz svih kantona u skladu s članom 10.16 stav (2) Izbornog zakona BiH u Domu naroda Parlamenta Federacije Bosne i Hercegovine nije dodijelila 11 mandata, odnosno, dodijelila je mandate za osam delegata iz reda Ostalih u Domu naroda Parlamenta Federacije Bosne i Hercegovine, te utvrdila da nedostaju tri delegata iz reda Ostalih.

Odredbama člana 10.16. stav (3) Izbornog zakona BiH, propisano je : „ *Izuzetno, Centralna izborna komisija Bosne i Hercegovine će donijeti poseban akt kojim će propisati način popune mjesta dodijeljenih jednom od konstitutivnih naroda ili grupi Ostalih koja ostanu upražnjena nakon provođenja postupka predviđenog u stavovima (1) i (2) ovog člana i popunit će nedostajući broj delegata iz reda konstitutivnog naroda ili iz reda Ostalih.*“

Centralna izborna komisija BiH je na 82. sjednici, održanoj 04.11.2022. godine, donijela Kriterije i postupak popune nedostajućih mandata u Domu naroda Parlamenta Federacije Bosne i Hercegovine (u daljem tekstu: Kriteriji).

Članom 2. Kriterija propisano je da za popunu nedostajućih delegata iz reda konstitutivnog naroda ili iz reda ostalih u Domu naroda Parlamenta Federacije Bosne i Hercegovine, Centralna izborna komisija Bosne i Hercegovine utvrđuje i primjenjuje sljedeće kriterije:

- a) broj stanovnika iz reda nedostajućeg konstitutivnog naroda ili iz reda ostalih po kantonima uzimajući u obzir apsolutni i procentualni broj stanovnika u odnosu na ukupan broj stanovnika,
- b) kvalifikovanost političkih subjekata (prijeđen cenzus i osvojen najmanje jedan mandat u skupštini kantona), a koji ima kandidata na kandidatskim listama iz reda nedostajućeg konstitutivnog naroda ili iz reda ostalih i
- c) broj osvojenih ličnih glasova kandidata sa liste političkog subjekta iz tačke b) ovog člana.

Za primjenu kriterija iz člana 2. tačka a) korišteni su podaci Popisa stanovništva iz 2013. godine

objavljenog u Službenom glasniku BiH broj: 60/16.

U skladu s članom 3. Kriterija određeno je da nepopunjena delegatska mjesta pripadaju kantonima koji imaju najviše stanovnika iz reda Ostalih u apsolutnom broju stanovnika kantona i procentualnom broju stanovnika u odnosu na ukupan broj stanovnika iz reda ostalih, a to su **Kanton Sarajevo (28.075 ili 35,16 %)**, **Tuzlanski kanton (17.815 ili 22,31 %)** i **Zeničko-dobojski kanton (12.808 ili 16,04 %)**, te da se popuna delegata u Domu naroda Parlamenta Federacije Bosne i Hercegovine vrši sa kandidatske liste političkog subjekta koji je osvojio najmanje jedan mandat u skupštini kantona, kandidatom iz reda Ostalih koji ima najveći broj osvojenih ličnih glasova u tom kantonu na Općim izborima 2022. godine.

Uvidom u Odluku o potvrđivanju rezultata Općih izbora 2022. godine u Bosni i Hercegovini („Službeni glasnik BiH“, broj: 73/22), utvrđeno je da devet političkih subjekata u Skupštini Zeničko-dobojskog kantona imaju osvojen najmanje jedan mandat, kako slijedi:

| Šifra | Politički subjekt | Broj mandata |
|-------|--|--------------|
| 00090 | SDA - STRANKA DEMOKRATSKE AKCIJE | 11 |
| 03083 | BOSANSKOHERCEGOVAČKA INICIJATIVA - KASUMOVIĆ FUAD - ZA BIH | 5 |
| 00008 | SDP - SOCIJALDEMOKRATSKA PARTIJA BOSNE I HERCEGOVINE | 5 |
| 03068 | ŽELJKO KOMŠIĆ - ZA GRAĐANSKU DRŽAVU - DF/GS | 3 |
| 02317 | NAROD I PRAVDA | 3 |
| 03099 | HDZBIH, HSSSR, HSS, HSPBIH, HKDU, HSPAS, HDU, HSPHB, HRAST, HDZ90, HNP | 3 |
| 03071 | NES | 2 |
| 01182 | SAVEZ ZA BOLJU BUDUĆNOST BIH | 2 |
| 00877 | NAŠA STRANKA | 1 |

Imajući u vidu naprijed navedeno, te uvidom u broj osvojenih ličnih glasova kandidata za Skupštinu Zeničko-dobojskog kantona iz reda Ostalih u Odluci o potvrđivanju rezultata Općih izbora 2022. godine u Bosni i Hercegovini, Centralna izborna komisija Bosne i Hercegovine je utvrdila da je Almir Babajić, kandidat iz reda Ostalih sa liste političkog subjekta SDP - SOCIJALDEMOKRATSKA PARTIJA BOSNE I HERCEGOVINE u Zeničko-dobojskom kantonu, osvojio najveći broj ličnih glasova, 1.976 glasova.

Shodno izloženom i na osnovu članova 2.9 stav (1) tačka 17. i 10.16 stav (3) Izbornog zakona Bosne i Hercegovine, te primjenom člana 2, 3. i 4. Kriterija, Centralna izborna komisija Bosne i Hercegovine je odlučila kao u dispozitivu ove odluke.

Pravna pouka: Protiv ove odluke, u skladu s članom 6.9 stav (1) i stav (2) Izbornog zakona Bosne i Hercegovine, može se podnijeti žalba Apelacionom odjelu Suda Bosne i Hercegovine u roku od dva (2) dana od dana objavljivanja ove odluke na internet-stranici Centralne izborne komisije Bosne i Hercegovine www.izbori.ba.

Žalba se podnosi preko Centralne izborne komisije BiH i dostavlja se putem faks aparata, na broj 033/251-329 ili neposredno u sjedište Centralne izborne komisije BiH, Ulica Danijela Ozme broj 7, Sarajevo.





Broj: 06-1-07-1-4939/22
Sarajevo, 27.12.2022. godine
E.K.

Na osnovu člana 209. Zakona o upravnom postupku Bosne i Hercegovine ("Službeni glasnik BiH", broj: 29/02, 12/04, 88/07, 93/09, 41/13 i 53/16), predsjednik Centralne izborne komisije Bosne i Hercegovine, d o n o s i

ZAKLJUČAK

o ispravci Odluke o dodjeli mandata u Domu naroda Parlamenta Federacije Bosne i Hercegovine broj: 06-1-07-1-4939/22 od 20.12.2022. godine

- (1) U dispozitiva Odluke o dodjeli mandata u Domu naroda Parlamenta Federacije Bosne i Hercegovine broj: 06-1-07-1-4939/22 od 20.12.2022. godine godine, riječi „Skupštinu Tuzlanskog kantona“ zamjenjuju se riječima „Skupštinu Zeničko-dobojskog kantona“.
- (2) Ovaj zaključak se prilaže originalu odluke i čini njen sastavni dio i proizvodi pravni učinak od dana od koga proizvodi pravni učinak odluka koja se ispravlja, odnosno od 20.12.2022. godine.
- (3) Ostale odredbe predmetne odluke ostaju nepromijenjene.

O b r a z l o ž e n j e

Nakon donošenja predmetne odluke uočena je očigledna greška u dispozitiva Odluke o dodjeli mandata u Domu naroda Parlamenta Federacije Bosne i Hercegovine, i to u nazivu skupštine kantona i to da je umjesto naziva „Skupštinu Tuzlanskog kantona“ navedeno „Skupštinu Zeničko-dobojskog kantona“.

Shodno izloženom i činjenici da se radi o očiglednoj grešci tehničke prirode, a u skladu s članom 209. stav (2) Zakona o upravnom postupku («Službeni glasnik BiH», broj: 29/02, 12/04, 88/07, 93/09, 41/13 i 53/16), odlučeno je kao u dispozitivu ovog Zaključka.

Ovaj zaključak stupa na snagu danom donošenja.



Dostavljeno:

- Skupštine kantona,
- a/a.